

明

史

明史卷七

本紀七

成祖下

八年春正月丙子張輔破賊於東潮州癸巳皇太子遣使自淮揚抵陳州視民疾苦蠲去年被水田租鬻子者官為贖工匠役京師者罷之二月戊戌朔帝將北征命皇長孫瞻基留守北京辛丑以北征詔天下丁未帝發北京癸亥遣使祭所過名山大川乙丑大閱命餽運民死傷者賜鈔復其家一年三月丁卯朔命王友督中軍柳升副之何福督左哨鄭亨督右哨陳懋督左掖劉才督右掖都督劉江督前哨辛未涼

州千戶虎保等叛皇太子命費瓛討之甲戌帝次鳴
鑾戌乙亥誓師丙子次凌霄峰謂侍臣曰諸將比來
不聞進一言何也對曰恃上有成算帝曰是何言與
好問則裕朕曷敢專任一己掩羣策哉庚辰勅減供
具之半丙申次清水原有甘泉自地湧出土馬給飲
不竭賜名神應夏四月庚申次威虜鎮水不給以橐
駝所載水賜衛士日已暮視諸營軍皆食始膳壬戌
皇太子命陝西災民賜復一年癸亥費瓛敗虎保於
雙城保遁五月丁卯朔帝發順安鎮行望臚胸河更
其名曰飲馬田戌次環翠阜謀言本雅失里聞大軍

至西奔遂渡飲馬河追之是日皇太子命賑滌宿二
州饑乙亥留王友劉才築城河上戊寅次兀古兒札
夜倍道進己卯追及本雅失里于幹灘河敗之本雅
失里以七騎遁去辛巳諸將獻俘帝曰朕所討者凶
渠耳此曹何與悉給糧畜遣歸壬午駐五原峰更名
幹灘河曰玄冥命祭之丙戌還次飲馬河下詔移師
征阿魯台丁亥回回哈剌馬牙殺都指揮劉秉謙等
據肅州衛以叛千戶朱迪等討平之壬辰帝次定邊
鎮祭陷沒將士六月癸卯夜渡飛雲壑甲辰阿魯台
請降賜勅諭之既而阿魯台為其下所沮猶豫未決

帝命諸將嚴陣待出輕騎挑之阿魯台迎戰以數千騎當中堅帝自將千騎陷陣寇衆披靡遂大敗之追北百餘里丙午抵長秀川焚其輜重丁未追及之于回曲津又大敗之戊申復追之于廣漢戌己酉旋師設伏禽躡後者殲之是月皇太子薨賴太和水災田租秋七月丁卯帝次開平帝在軍念士卒艱苦多蔬食是日宴將士頒所獲牛馬始復常膳甲戌次龍門皇太子遣官來迎并進袍服帝曰將士衣裘盡敝朕何忍獨易衣待入關同將士易之未晚也辛巳鳳陽安慶徽州鎮江饑皇太子命賑之壬午帝至北京甲

午論功行賞八月壬寅進封柳升安遠侯癸卯賑輦
昌饑乙卯寧遠侯何福自殺庚申黃河溢壞開封城
遣使撫卹九月己巳幸天壽山賜工匠軍民鈔壬辰
遣中官齎書幣往西土徵尚師昆澤思巴冬十月丁
酉帝發北京是月倭寇福州十一月甲戌帝至京師
呂宋入貢十二月癸巳朔阿魯台遣使貢馬壬寅蠲
如皋水災田租丁未詔阿魯台曰爾言元子孫已絕
欲率所部來歸甚善朕君臨天下惟欲使萬方之人
咸得其所凡有來者推誠待之無間爾謂瓦剌未獻
傳國寶歸附非誠不知朕未嘗重此寶帝王所寶在

德不在玉也戊午陳季擴上表乞降以爲交趾右布政使是月楚王楨周王橚來朝是年失捏干寇黃河東岸寧夏備禦都指揮王儼敗沒

九年春正月己卯復命張輔爲征虜副將軍會沐晟討交趾餘寇己丑蠲祁水災田租二月癸卯帝御右順門覽章奏案有金獅鎮紙幾墜帝顧侍臣曰一器之微置之安則安置之危則危天下大器也小不謹足以致危自今朕有關失及裁決不當六科皆駁奏朕不憚改辛亥陳瑛有罪下獄死甲寅秦王尚炳入朝丙辰赦交趾免雜課三年丁巳倭陷昌化千戶所

己未命宋禮開會通河三月辛酉朔策試永樂七年
天下貢士賜蕭時中等八十四人進士及第出身有
差夏四月己酉召遼谷瀋安唐郢伊肅晉諸王以長
幼序先後來朝丙辰賑綏德隆德諸州縣饑丁巳張
輔至南寧以陳季擴詐降進兵討之六月甲午蠲冰
陽雹災田租乙巳鄭和還自西洋俘錫蘭山國王以
獻釋之通泰興江都儀真海門暴風雨海溢溺人民
遣使撫卹是月賑沁遼龍游諸州縣饑秋七月庚申
朔陝西疫遣戶部侍郎王彰祭西嶽庚午蠲烏程諸
縣水災田租乙亥柯枝彭亨急蘭丹南巫里加異勒

入貢丙子張輔敗賊于月常江甲申滿剌加國王拜
里迷蘇剌率妻子來朝戊子賑臨城饑九月乙丑賜
桂林今年田租之半丙寅蠲賴汝魯山去年水災田
租庚午下趙昺于獄尋釋之庚辰有告建文時人所
上楚王書語多干犯者通政司請付法司帝曰朕為
天下主豈念舊惡曩常詔建文中上書有干犯者毀
之告者勿行今復行之是不信也其已之冬十月己
未詔謫徙北京為民及充軍屯種者弛其賦役乙巳
復修太祖實錄丙午有干戶不待朝命擅發兵捕盜
中官以聞都給事中倪峻請罪之帝曰國家養兵以

除暴衛民也必待報後發殃民多矣聞豎不達大體
爾亦為是言耶千戶無罪戊申趙王高燧來朝十一
月戊午朔蠲陝西逋賦癸亥張輔敗賊於生厥江丁
卯立皇長孫瞻基為皇太孫丙子慶王璘來朝詔法
司決遣輕罪是月復遣使督瘞戰場暴骨十二月乙
未大雨雪諭呂震曰靖難初將士苦寒有裂膚墮指
者艱難戮力恒軫朕懷其賜故從征將士存者鈔蠲
順天去年水災田租閏十二月丁巳朔命府部諸臣
條列軍民利弊以聞庚申雷暴雨海溢溺人民有司
不以聞命所司按治辛巳賑臨晉饑甲申蠲景陵湯

陰水災田租

十年春正月戊子封左都督吳允誠為恭順伯己丑命入覲官奏陳民瘼不言者罪之言有不當勿問壬寅詔諸司毋以雜務差遣府州縣正官俾專職理民己酉賑隴饑壬子魯王肇輝來朝徙民越訴及誣告者墾田北京癸丑平陽饑遣使馳賑逮布政使以下不奏聞者罪之二月辛酉蠲山西河南逋賦庚辰遼王植有罪削其護衛三月乙酉朔策試天下貢士賜馬鐸等一百六人進士及第出身有差癸巳始命進士分詣法司理刑獄甲辰蠲北京水災州縣田租戊

申賑遂平饑夏四月賑萊州平陽諸府許襄城諸州
縣饑凡發粟九十萬石五月辛丑蠲開封諸府水災
田租六月戊午建武當山宮觀辛未荊州諸府水遣
使撫卹甲戌諭戶部曰比河南饑有司漠然若不聞
或反言穀登欺罔若此獲罪於天其速發粟賑之郡
縣有司及朝使目覩民艱不言者悉逮治秋七月甲
午封耶巴乃那為錫蘭山國王癸卯禁中官干預有
司政事是月蠲吳江長洲崑山常熟嘉興水災田租
八月癸丑朔張輔大破賊兵於神投海丙辰選民間
子弟材武者侍衛皇太孫己未勅邊將繕築塞垣九

月甲午帝自製文祭長陵役夫亡者命函骨歸葬復其家二年戊戌喃渤利入貢丁未渤泥國王遐旺偕其母妻來朝冬十月丁卯皇太孫演武於方山甘露降羣臣表賀戊辰獵於城南之武岡十一月庚寅賑麗江饑丙申復遣鄭和使西洋是月蠲烏程歸安臨海水災湘陰海康遂溪旱災田租十二月壬子朔復遣宋禮採木四川庚午蠲黃州常德及中牟河內諸縣水災田租壬申賑邳饑

十一年春正月辛巳朔日有食之勅曰朕垂於治理上累三光衆陽之宗薄食元旦咎孰甚焉爾羣臣尚

勉輔朕消弭災變朝賀宴會之禮悉罷之百官節鈔
如例壬午諭通政司給事中曰朕今朝覲有司言民
利病率云田穀登閭閻樂業比聞山西饑民資草木
供食而有司無一言自今爾曹識之境内災傷為他
人所奏者治其欺隱之罪辛丑倭寇浙江爵谿所敗
去大理寺丞王高劉端坐縱姦黨外親棄市壬寅蠲
徐逋賦二月辛亥廢思南思州宣慰司以其地為貴
州布政使司癸丑賑崇明德安建昌豐城莒沂水饑
戊午尚師昆澤思巴至尋封爲大乘法王壬戌將巡
北京榜諭護從軍士毋擾民犯者官旗連坐甲子命

皇太子監國乙丑帝發京師命給事中御史所過存
問高年賜酒肉及帛丙寅葬仁孝皇后於長陵辛未
帝至中都三月甲辰烏程諸縣饑皇太子命賑之夏
四月己酉朔帝至北京己巳詔法司平理獄訟戊寅
賑安丘饑五月辛巳蠲博興高苑樂安新城水災田
租丁亥定運糧納鈔贖罪例壬寅以陵工成進封王
通成山侯丁未曹縣獻騶虞呂震請表賀不許六月
戊申朔武當山五色雲見羣臣表賀甲寅賑徐饑壬
戌蠲樂亭水災田租癸亥烏程歸安德清疫遣使撫
卹癸酉西域失刺思俺的干俺都准土魯番柳城哈

石哈兒入貢秋七月戊寅朔封阿魯台為和寧王乙
巳除常德諸府及長洲崑山去年水災田租八月戊
申賑仁和嘉興饑乙丑命鎮遠侯顧成及都督同知
梁福討思州靖州叛苗九月庚辰命扈從軍種麥人
二十畝壬午諭戶部曰近山東蝗有司不問朝廷知
而捕之已滋蔓矣自今郡縣每歲春初行視境內有
蝗蝻害稼即捕絕之母令遺種不如詔者并二司罪
之冬十月丙寅命皇太子錄囚十一月戊寅以野蠶
繭為余命皇太子薦太廟十二月壬子張輔沐晟大
敗賊兵于愛子江是歲瓦剌馬哈木等弑其主本雅

失里立荅里巴為可汗

十二年春正月丁亥命修曲阜孔子廟庚寅思州苗平壬辰張輔擒交趾賊鄧景異等誅之甲午漢王高煦還京師二月己酉大閱庚戌帝將北征瓦剌命柳升領大營鄭亨領中軍陳懋李彬領左右哨王通及都督譚青領左右掖劉江朱榮為前鋒丁巳召晉王濟熿來京師庚申賑隴饑罪有司不言者三月庚辰賑揚州水災癸未張輔遣軍追陳季擴于老撾獲之送京師庚寅帝發北京皇太孫從辛丑次萬全諭督餉忻城伯趙葵等曰數千里餽運民綦勞矣宜為朕

朝夕撫勞無任刑威以重朕過壬寅靈壁常熟洛陽
安丘安化諸縣饑皇太子命賑之夏四月甲辰朔駐
興和大閱己酉頒號令于軍中庚戌詔曰軍令嚴則
人心一功賞明則人心勸今或朝發一令夕不下聞
是不嚴也將士効力名不上達是不明也其立傳令
及紀功官五月丁丑命尚書以下為督陣官察不用
命者辛卯駐速兒溫都兒水清列賜名蒙山海己亥
謀報瓦剌衆東行命劉江追之是月吳新蔡魯山諸
縣饑皇太子命賑之六月甲辰駐雙泉海劉江遇瓦
剌兵與戰敗之戊申次忽蘭忽失溫荅里巴馬哈木

太平把禿字羅等率衆迎戰帝升高阜見寇為三隊
命柳升等攻其中李彬陳懋等分擊左右火器齊發
帝親將鐵騎馳之寇大敗殺王子十餘人復追敗之
土刺河荅里巴等遁是日皇太子蠲通水災田租辛
亥班師駐回流甸遣使諭阿魯台戊午駐三峰山阿
魯台遣使來朝己巳駐黑山峪以平瓦剌詔天下秋
七月丙子詔各邊增設烽堠戊子次紅橋詔軍士入
關有踐田禾取畜產者以軍法論并罪將吏辛卯命
李彬王通休士於興和己亥嵩宜陽仁和新寧諸縣
饑皇太子命賑之八月辛丑朔帝至北京丙午賜北

京州縣田租二年壬子賑滄通固安水災寶坻雹災
甲寅忽魯謨斯入貢戊午賚從征將士九月辛未朔
封平陽王濟熿為晉王丁丑榜葛剌貢麒麟呂震請
表賀不許丙戌靖州苗平戊子清遠侯王友有罪下
獄奪爵閏九月甲辰下右春坊大學士黃淮左諭德
楊士奇洗馬楊溥苗善正字金問等于獄未幾釋士
奇復職丁巳崇明海溢漂廬舍命賑之復徭役二年
冬十月丙申奪江陰侯吳高爵十一月庚戌廢晉王
濟熿為庶人甲寅詔修五經四書性理大全庚申蠲
蘇州松江杭州嘉興湖州水災田租四十七萬餘石

十二月己丑蠲豐潤樂亭水災田租庚寅朱濬卒

十三年春正月丙午塞居庸以北山隘丁未瓦剌馬
哈木等遣使謝罪請朝貢如初許之壬子北京午門
燈山火都督同知馬旺焚死丁巳詔皇太子曰上元
張燈意在與民同樂守者不謹致蒙天戒朕方祗懼
爾亦宜加慎其悉罷諸司進獻戊午布寬恤之令罷
諸不急務民間宿逋及將士犯罪悉除之遣御史吳
文等分行天下察吏治得失訪民疾苦二月甲戌始
會試天下貢士于北京癸未張輔等師還戊子論平
交趾功賞賚有差丁酉賑河間饑是月蠲興化金壇

水災及濟南去年田租先是帝命出輕繫囚輸作贖罪既而多亡者有司請捕之帝曰此為飢寒迫耳命役者悉還家期秋成畢赴工令下不願去者七百餘人帝嘉之并在役者四千餘人盡釋之三月己亥朔策試天下貢士賜陳循等三百五十一人進士及第出身有差癸卯皇太子命御史巡行畿內瘞暴骸丙午廣西蠻叛都指揮同知葛森討平之夏四月戊辰朔命張輔鎮交趾甲申金忠卒丙戌吏部左侍郎陳洽為兵部尚書仍贊交趾軍務是月賑真定永平滄桐廬西安饑五月丁酉朔日有食之乙丑鑿清江浦

通江淮運道六月戊辰改劉觀為左都御史甲申蠲
遼水災田租是月遣使賑北京河南山東水災凡給
粟三十二萬餘石鈔三十二萬餘錠復被水民徭役
一年秋七月癸卯鄭和自西洋還俘蘇門答刺賊首
蘇幹刺以獻甲辰復遣侯顯使榜葛刺諸國乙巳四
川山都掌蠻亂掌都司事都督同知李敬討平之庚
申賑魏瑞昌永川巴射洪諸縣饑八月丁亥賑河南
新安諸縣饑是月蠲大城武強水災田租九月癸卯
甘巴里入貢戊申西域貢獅子百官表賀冬十月壬
辰法司奏侵冒官糧者帝怒命戮之及覆奏帝曰朕

過矣其論如律自今死罪皆五覆奏著為令十一月
壬子麻林貢麒麟百官表賀己未賑海陽潮陽揭陽
饑十二月蠲順天蘇州浙江湖廣河南山東州縣水
旱田租

十四年春正月己酉除北京河南山東逋租仍遣使
賑之凡發粟一百三十七萬餘石辛酉命都督金玉
討廣靈山寇平之三月庚子禮部左侍郎金純為尚
書壬寅阿魯台擊敗瓦剌遣使獻捷辛酉修龍虎山
上清宮夏四月甲子詔曰曩姦臣齊泰等謀危社稷
皆已伏誅復芟蕪去穢惡類己翦自今凡姦黨遠觀

未發覺者悉宥之壬申禮部郎中周訥請封禪尚書
呂震贊之帝曰今天下雖無事水旱疾疫時時奏報
朕每惕然於心安敢自謂太平且封禪六經所不道
唐魏徵每以堯舜之事望太宗爾欲朕封禪異乎徵
之愛君矣乙亥胡廣為文淵閣大學士五月甲辰賑
六安英山礪山蕭西安諸州縣饑六月壬申賑平陽
大同饑秋七月丁酉捕北京河南山東蝗壬寅河決
開封乙巳掌錦衣衛都指揮僉事紀綱伏誅丙午應
城伯孫巖有罪廢徙交趾是月永平金華衢州廣信
饒州建寧邵武延平水遣使賑恤八月丙寅改工部

尚書吳中於刑部戊寅召谷王穗來京師丁亥作西
宮於北京九月己亥蠲寧陵水災田租戊申帝發北
京命給事中御史存問高年甲寅皇太子命蠲鹽城
水災田租冬十月丁丑帝次鳳陽謁皇陵癸未至京
師十一月戊子朔錫蘭山刺撒溜山沙里灣泥木骨
都束不刺哇阿丹入貢辛丑周王橚來朝壬寅帝欲
遷都北京詔文武羣臣集議羣臣奏曰北京北枕居
庸西峙太行東連山海南俯中原沃野千里水甘土
厚民俗淳樸物產豐殖此天府之國也昔高皇帝以
授陛下肇建大業即位之初首立北京羣臣請營宮

室陛下重勞民力紆回及今比年車駕巡幸萬國來
同民和物阜禎祥叶應天啓人基昭然可知今漕運
既通儲蓄充溢惟早賜聖斷為宗社無疆之計帝曰
善遂營北京城闕丙午召張輔還戊申削漢王高煦
二護衛丁巳楚王楨來朝徙山東山西湖廣流民于
保安州賜復三年十二月丁卯復遣鄭和使西洋
十五年春正月遼王植潘王模寧王權蜀王椿安王
楹晉王濟曠皆來朝二月癸亥廢谷王穗為庶人丁
卯命李彬鎮交趾是月魯王肇輝肅王棖慶王璠皆
來朝三月丙申命囚自雜犯死罪以下輸作北京贖

罪辛丑建洪恩靈濟宮於北京以祀南唐徐知證知
諤丙午漢王高煦有罪處之樂安壬子帝北巡發京
師命皇太子監國夏四月庚申蠲邯鄲水災田租己
巳帝次邾城禁軍士踐民稼有傷者蠲其租先被水
旱逋租並除之癸未西宮成五月丙戌朔帝至北京
戊子作安樂營以居役夫之病者遣醫視療死者歸
其骸葬之辛丑徙平陽大同蔚貧民于廣平真定給
田以耕蠲其租一年閏五月癸酉禁僧尼私建菴院
六月丁酉交趾黎核等作亂李彬遣都督朱廣討誅
之秋七月戊寅壽星見羣臣請賀不許八月辛卯權

蘇祿東國王巴都葛叭荅刺西國王麻哈吒葛刺麻
丁入朝皆封為國王甲午甌寧人進金丹帝令自餌
燬其方書己酉沙縣賊陳添保浙西賊倪弘三伏誅
九月乙丑巴都葛叭荅刺卒於德州詔有司葬之冬
十一月癸酉改前禮部尚書趙珪於兵部巡視塞北
屯戍

十六年春正月甲寅交趾黎利反朱廣擊走之甲戌
倭陷松門衛浙江僉事石魯坐誅二月癸巳遣御史
撫視隨棗陽流民三月辛亥朔策試天下貢士賜李
騏等二百五十人進士及第出身有差戊寅姚廣孝

卒夏五月辛亥于達里入貢丁巳胡廣卒秋七月己巳勅責陝西布政司按察司曰比聞秦中歲屢不登流殍載道爾輩身爲方牧坐視不以聞安所逃罪其速發倉廩賑之緩者誅無赦八月失刺北沙哈魯兀魯伯入貢九月甲子殺贊善梁潛司諫周冕冬十月癸卯限天下僧道之數十一月癸酉命侯伯年少者讀書國子監十二月辛丑命王通賑陝西饑

十七年春正月癸丑安定王尚姪有罪廢爲庶人二月乙酉命興安伯徐亨率騎兵往來興和開平大同備禦三月丁未亦思弗罕入貢丁巳爲善陰隲書成

命有司以試士比大誥夏四月壬寅申嚴金銀交易之禁五月丙午都督方政討黎利於可藍柵敗之利走老撾戊辰建寧邵武延平大疫皇太子免其徭賦六月壬午蠲順天去年水災田租戊子倭寇金州衛遼東總兵官劉江大破之秋八月壬午黎利寇磊江敗去癸未乂安土知府潘僚反李彬擊走之九月丙午滿剌加國王亦思罕荅兒沙率妻子入朝壬子封劉江為廣寧伯丙辰慶雲見呂震請表賀不許冬十一月丙午李彬敗潘僚於玉麻州僚走老撾甲子廣北京南城戊辰交趾陶強反官軍捕之不利十二月

戊寅交趾丁宗老反指揮方政擊敗之庚辰詔在外
繫囚當死者送京師會官廷鞠三覆奏然後行刑乙
酉李彬破交趾賊范玉於東潮州尋獲之乙未命工
部侍郎劉仲廉許廓往交趾覈實戶口田賦詢軍民
利病戊戌李彬破賊于麻浪社斬陶強

十八年春正月癸卯都指揮徐諤敗黎利於磊江閏
正月丙子楊榮金幼孜為文淵閣大學士二月丙寅
蒲臺妖婦唐賽兒作亂命柳升率軍討之三月辛巳
柳升攻賊于益都都指揮劉忠戰歿賽兒遁去甲申
都指揮僉事衛青指揮王真各率兵敗賊俘其黨誅

之戊子山東布政使儲挺張海按察使劉本等坐縱
寇誅癸巳廣東寧遠大水沒民田詔蠲其租別以閒
田給之戊戌徵柳升下獄以唐賽兒不獲盡逮北京
山東尼及女道士至京鞠之夏五月丁丑命天下婦
女出家者悉送京師庚寅交趾右叅政侯保左叅政
馮貴禦賊死之六月己酉遣廣東右叅政陳誠同中
官郭敬使西域秋七月辛巳賑萬饑八月丁酉朔日
有食之九月己巳遣夏原吉召皇太子丁亥詔自明
年改京師為南京北京為京師悉去諸司行在之稱
冬十月乙巳古麻剌郎國王幹刺義亦敦奔率妻子

來朝庚申方政敗黎利于老過十一月戊辰以遷都
詔天下丁亥海康遂溪颶風海溢蠲其田租是月賑
青州萊州饑發粟四十七萬餘石十二月甲辰左副
都御史李慶為工部尚書右副都御史王彰為右都
御史甲寅封右都督郭義為安陽侯薛祿陽武侯都
督同知薛斌永順伯都督僉事金玉惠安伯郭資為
戶部尚書己未皇太子及皇太孫至北京癸亥蠲鳳
陽旱災田租北京郊廟社稷宮殿門闕成是年八荅
黑商入貢

十九年春正月戊寅大赦天下乙酉祖法兒入貢壬

辰黜魏國公徐欽為民二月辛丑都督僉事胡原率
師巡海捕倭丙午周王橚有罪召至京師尋赦還國
壬戌楚王禎慶王璘來朝是月賑全椒吳橋通渭饑
三月丁丑策試天下貢士賜曾鶴齡等二百一人進
士及第出身有差夏四月庚子奉天華蓋謹身三殿
災命羣臣直言闕失乙巳詔除天下逋賦及被災田
租停不急務罷遣諸番寶船及西北買馬文武官以
罪譴者還其職諸司官吏及所遣官役壞法虐民者
械送京師並家屬戍極邊癸丑遣蹇義等二十六人
巡行天下安撫軍民丙辰詔曰比以殿災降詔求言

蓋欲聞朕過及軍民疾苦而言者語不及政多譏訕
之詞甚乖國體自今蹈前非者罪之五月乙丑出給
事中柯暹御史何忠鄭惟桓羅通為交趾知州壬申
周王橚奏納三護衛六月賑吳潛山東光西安瑞昌
饑秋七月丁卯申自宮之禁癸酉賑歙寧津高邑新
寧上杭饑八月辛卯朔日有食之冬十一月辛酉分
遣中官楊賓御史戴誠等覈天下庫藏出納之數丙
子議征阿魯台下夏原吉吳中及大理丞鄒師顏于
獄方賓自殺己卯遣中官楊慶御史譚原清如南京
覈倉糧出納之數甲申命王彰及侍郎張本等分督

兩畿山東山西河南造車發丁壯輓運期明年二月
至宣府

二十年春正月己未朔日有食之免朝賀壬申李彬
卒于交趾丙子賑龍游寧鄉饑二月己巳隆平侯張
信尚書李慶等分督北征軍餉從二十三萬餘人三
月丙寅賑開徐高邑靈壽樂城饑詔有司遇災荒先
賑後聞乙亥阿魯台寇興和帝將親征丁丑命皇太
子監國戊寅帝發京師辛巳次鷄鳴山阿魯台宵遁
癸未次宣府甲申大饗將士夏四月庚寅頽饑皇太
子命賑之壬子詔民運餉塞外者復其家一年乙卯

次雲州大閱五月己未廣州諸府颶風海溢溺人民
皇太子遣使撫恤乙丑獵於偏嶺丁卯大閱庚午令
從征侯伯較射于行營辛未次西涼亭顧謂侍臣曰
元人營此為巡遊地何意今日鞠為茂草書云厥德
靡常九有以亡况一亭乎此可鑒也因下令禁伐亭
傍樹木壬申大閱甲戌勅皇太子軍國事與大臣熟
議行之不必奏聞乙酉次開平六月壬辰次清平鎮
令軍行出應昌結方陣以進癸巳謀報阿魯台攻萬
全諸將請分兵還擊帝曰詐也彼恐大軍搗其巢穴
希圖牽制耳豈真敢攻城哉甲午進次陽和谷萬全

賊果遁去庚戌次玉沙泉秋七月戊午次環秀岡己未謀知阿魯台棄輜重北走乃發兵焚其輜重收所遺牛羊駝馬遂班師謂諸將曰阿魯台敢為悖逆恃兀良哈為之羽翼也師還當亟翦之於是命諸將選步騎二萬分五道進帝曰軍至寇且西走從西邀之必獲庚午至屈裂兒河寇數萬人果驅畜產西走帝麾左右翼夾擊自將精騎衝之斬首數百級又伏神機弩于深林中寇遇伏發遂大潰追奔三十里斬部長數十人盡收其畜產辛未徇河西捕斬餘寇甚衆癸酉皇太子命蠲兩京河南山東水災田租乙亥宋

禮卒丙子帝次聞喜岡八月戊戌次玻璃谷諸將分
道進者俱來獻捷辛丑以班師詔天下九月壬戌帝
至京師癸亥下左春坊大學士楊士奇于獄丙寅下
蹇義呂震于獄尋俱釋之己巳宴從征將士辛未封
左都督朱榮為武進伯都督僉事薛貴安順伯冬十
月戊子詔逃民復業者積逋悉免之癸巳分遣中官
及朝臣八十人覈天下倉糧出納之數甲辰蠲寧晉
旱災田租十二月乙未賑英山饑閏十二月丙寅賑
登州饑發粟五十萬石甲戌蠲鳳陽碭山蕭水災田
租戊寅夜乾清宮災

二十一年春正月癸卯榮昌伯陳智敗黎利于車來
二月己巳都指揮使鹿榮討柳州諸蠻平之三月己
亥盜竊南京大祀壇蒼壁黃琮御史王愈等會決重
囚誤殺無罪者坐棄市是月賑吳橋桐城登封饑夏
五月癸未蠲開封歸德南陽衛輝水災州縣及宿州
去年田租己丑護衛指揮孟賢等伏誅六月庚戌朔
日有食之秋七月辛丑復親征阿魯台命皇太子監
國壬寅帝發京師甲辰次土木宴將士乙巳戮軍士
取田穀飼馬者戊申次宣府八月己酉朔大閱辛酉
湖廣會同饑皇太子命賑之甲子禮部侍郎胡濙進

太和山瑞光圖及榔梅靈芝呂震率百官表賀乙亥
召故晉王濟熈及其子美圭至封美圭為平陽王丁
丑皇太子命蠲兩畿山東被災州縣田租九月戊子
帝次西陽河癸巳迤北知院阿失帖木兒等來降言
阿魯台為瓦剌所敗部落潰散遂駐師不進冬十月
甲寅迤北王子也先土干率所部來降己巳封為忠
勇王庚午下詔班師十一月甲申帝至京師十二月
丁卯朝鮮貢馬乙亥命交趾諸臣病亡者有司歸其
喪

二十二年春正月壬午下天下朝覲官二千四百七

十人于詔獄命輸作贖罪甲申阿魯台犯大同開平
邊詔諸將整兵俟命二月丁未薛祿討長興賊吳貴
歸平之三月丁丑朔策試天下貢士賜邢寬等百五
十人進士及第出身有差戊寅大閱丁酉滿剌加國
王四哩麻哈剌者率其妻來朝夏四月戊申命皇太
子監國己酉帝發京師乙卯吳橋饑皇太子命賑之
庚午帝次隰寧謀言阿魯台走荅蘭納木兒河遂趣
進師五月己卯次開平乙酉瘞道中暴骨壬辰次長
樂鎮謂楊榮金幼孜曰漢高過柏人慮迫于人今朕
至長樂思與天下同樂也丁酉宴羣臣于清平鎮命

中官歌太祖御製詞五章曰此先帝所以戒後嗣也
朕雖在軍旅何敢忘之己亥次威遠川復宴羣臣帝
自製詞五章命中官歌之廣平順德揚州及河南湖
廣州縣被水皇太子命蠲其田租六月庚申帝次天
馬峰命張輔等窮搜山谷三百餘里無所得癸亥輔
等請假一月糧深入取之帝曰今孽寇所存無幾茫
茫廣漠譬求一粟于滄海可必得耶遂命班師秋七
月庚辰次清水源命楊榮勒石于高崖曰使後世知
朕親征至此也戊子次雙流灤遣呂震以旋師諭太
子詔告天下己丑次蒼崖戍帝不豫庚寅至榆木川

疾大漸遺詔傳位皇太子喪禮一如高皇帝遺制辛卯帝崩年六十有五太監馬雲與楊榮等以六軍在外秘不發喪鎔錫為柩斂畢載以龍輦所至御幄朝夕上膳如常儀壬辰楊榮偕中官海壽馳討皇太子壬寅帝舉次武平鎮八月甲辰楊榮等致遺詔於皇太子皇太子哭拜受命即日遣皇太孫奉迎於開平己酉舉次鵬鶚谷皇太孫至發喪六軍皆哭辛亥臣民迎哭于居庸關壬子及郊皇太子迎入仁智殿加殯納梓宮九月壬午上尊謚曰體天弘道高明廣運聖武神功純仁至孝文皇帝廟號太宗十二月庚申

葬長陵嘉靖十七年九月改上尊謚曰啓天弘道高明肇運聖武神功純仁至孝文皇帝廟號成祖帝剛果善斷能決大謀用兵常以少擊衆開闔如神身先士卒所向克捷知人善任使士有一藝輒錄用弗遺與臣下語表裏洞達無纖芥之嫌不侈禎祥每謹災變水旱饑饉賑卹如弗及以故六軍數出工役繁興而民不至困敝在位二十二年厲精勤政威德遠被窮荒絕域受朝命修職貢者數十國其建司置衛設官世守者以千百計有明功烈蓋於斯為盛矣惟性好用兵晚年邊塵已息猶出師不已卒至殞身塞外

實由黷武所致云

論曰間嘗以靖難之舉實成於激敢問何也諸姬被黜削勢將及我不為偏乎顧燕山上告變矣櫛櫛之獄詞連代岷矣閔予小子遭家不造其安之乎大叔京城蔓難圖也許田璧假無封靡於爾邦他日改玉改步即叔父忍自為之乎北平于役如之何其能已也無何稱戈內向名誅錯而數之開國承家小人勿用燕王於是乎有辭矣然疾大漸惟幾言猶在耳而望葬之計至秘而不傳其信有之乎金川既入哭孺子以謝先皇曰凡吾所以來為負扆耳嗚乎似也獨

不曰成王之子尚在乎斯言出而公將語塞矣雖則
云然第四子類我高帝不嘗云爾乎傳位季歷以及
於昌用光大我國家皇天后土實聞此言矣於文皇
乎何尤

明史卷八

本紀八

仁宗

仁宗諱高熾成祖長子也洪武二十八年冊爲燕世子成祖嘗謂次子高煦英武類己愛之第三子高燧亦用慧黠有寵及其舉兵也以高煦自隨而留帝及高燧居守帝善拊士卒用能拒李景隆五十萬之衆以全北平而高煦在軍中以戰功益見愛中官黃儼等亦爲高燧謀所以傾帝者會中朝與帝書將以行間也帝不敢開視馳上成祖儼則先遣人潛報言帝與朝廷通謀高煦亦力贊儼言成祖未有以發而帝

嫡成祖以太孫英武卒不易仁宗既即位立爲皇太子洪熙元年春南京地震命帝往鎮之仁宗不豫以璽書馳召時南京已傳仁宗晏駕從臣慮漢王有異謀請整兵衛間道行帝不可六月辛丑至良鄉聞遺詔哭慟幾絕入宮發喪壬寅命衛軍解嚴英國公張輔等諫之帝曰天下神器非智力所能得况祖宗有成命其孰敢萌逆志即日悉撤去庚戌即皇帝位大赦天下以明年爲宣德元年甲寅始聽政西角門賑德州以南饑趣中官采辦者還罷市物濟寧知州蔣資請以夏麥抵前二年租從之乙卯賜見役軍匠

布鈔諭戶部諸司坐派遣辦諸珍物悉罷之吏部言
官吏宥免罪輒以親喪去有詐者帝曰父母之恩大
矣君子不逆詐若果懷姦事發重治之復孫亶鞏昌
知府謂吏部曰郡得一賢守則一郡安吉龔黃亦人
耳亶能得衆心宜從軍民請留之王和等以賊敗遇
赦應還職帝曰士大夫當務廉恥古人不飲貪泉蓋
惡其名和等既貪墨豈宜復任方面無爲饑奏請倉
穀貸之帝諭夏原吉曰太祖預備倉視前代最爲良
法爾徧行郡縣申明舊典俾存實惠勿忽藍山蠻相
仇殺首服赦之海門衛獻所俘倭寇丙辰新安知縣

州太平寧國杭州水災乙卯納哈出寇遼東都指揮
馬雲葉旺敗之是年詔進士國子生初仕者所犯雖
死罪三宥之

九年春正月戊午選武臣子為散騎叅侍舍人充宿
衛甲子祀圓丘告諸王之國是月蠲河間保定旱災
田租湯和傅友德及都督僉事藍玉王弼右丞丁玉
率師備邊延安元四大王寇朔州山西民賈驥禿魯
不花聚衆應之三月己卯詔賜山西陝西河南北平
浙江江西福建湖廣及淮安揚州安慶徽州池州今
年田租夏四月己丑命今年稅糧未蠲者許以銀錢

鈔絹代輸京師久旱不雨至是月庚戌始雨五月乙卯禁陝西四川軍民入西番市易壬戌工匠營宮殿死者給槨積賜鈔歸葬復其家三年即龍光山為壇祭之是月元國公九住寇陝西官軍擊敗獲之六月丁亥宋濂為翰林學士承旨甲午改行中書省曰承宣布政使司乙未日照知縣馬亮考滿入覲帝閱其考曰亮無課農興學之績而長於督運棄本而事末非愷悌之政也黜之秋七月癸丑朔日有食之甲子立倒鈔法是月蠲蘇州松江嘉興湖州水災永平旱災田租元將伯顏帖木兒寇延安傅友德敗之平章

元納互執之以降八月己亥覽邦入貢己酉遣官省
歷代帝王陵寢禁芻牧置守陵戶定三年一遣祭忠
臣烈士祠宇有司以時葺治西番朶兒只巴叛寇罕
東河州指揮甯正擊走之九月甲子詔邊衛指揮殲
王事者禮部紀其亡日至期遣祭閏九月庚寅以五
星素度日月相刑詔求直言冬十月庚申黃平蠻叛
重慶諸衛合兵討平之甲戌誅天下官吏挾空印冊
籍勾校錢穀者丙子詔秦晉燕吳楚齊六王練兵鳳
陽十一月戊子徙山西及真定民無業者田鳳陽給
冬衣戊申靖江王守謙之國是月蠲饒州及易祁清

苑諸州縣旱災田租十二月甲寅太平寧國蘇州松江常州嘉興湖州杭州荊州黃州水遣戶部主事趙乾等賑之乾尋坐稽延誅己未詔諸司九年考滿己卯歸元臣蔡子英於塞北都督同知沐英馳傳詣閬陝問民疾苦貴州新添蠻叛指揮顧成討平之十年春正月辛卯以羽林等衛軍益秦晉燕三府護衛甲辰諭中書省臣曰選人淹滯久候乏資或餬口醫卜使賢者喪所守非朝廷待士之道自今銓除後各計品為差予道里費有司給舟車送之著為令是月賜蘇州松江嘉興湖州諸府民前被水患者戶鈔

曰此朕心也後又諭士奇曰近見羣臣甚能愛朕朕有過方自悔而進言者已至良愜朕心又曰有言拂朕者必反覆思之不憚於改諸臣其體此意庚子永城河溢免其去年稅糧十二月癸卯詔建文朝諸臣外親戍邊者止留一丁戍所餘悉放還辛亥揭天下三司官姓名奉天門西序癸丑罷海子至西湖巡視官弛其旁近水草以利民免凡被災者稅糧庚申葬太宗文皇帝于長陵丙寅鎮遠侯顧興祖破平樂潯州蠻

洪熙元年春正月壬申朔御奉天門朝羣臣樂懸而

不作南京龍山產逆呂震請表賀不許乙亥詔中外
文武羣臣修舉職業癸未以時雪不降勅羣臣修省
丙戌大祀天地于南郊以太祖太宗配庚寅權增市
肆門攤課程癸巳設繕工官以工部左侍郎李友直
爲尚書專領之己亥遣布政使周幹按察使胡概參
政葉春巡行南畿浙江察民利病二月戊申祭社稷
以太祖太宗配丙辰耕籍田是月賑舞陽睢寧清河
饑三月丙子詔外官歷三考者聽展省丁丑求直言
辛巳命吏部慎擇刑官戊子隆平饑戶部請以相鄉
官麥貸之帝曰饑卽賑之何貸爲己丑詔曰刑者所

以禁暴止邪導民于善非專務殺也吏或深文傳致
比附重辟朕深憫之自今其悉依律科決或朕偶于
律外用籍沒及磔刑者法司執奏五奏不允同三公
及大臣執奏必允乃已諸司毋得鞭囚背及用宮刑
有自宮者以不孝論罪犯非謀逆勿連坐親屬古之
盛世聽采民謠用資戒警今奸人往往撫拾誣爲誹
謗法吏刻深鍛鍊成獄刑之不中民則無措其除誹
謗禁但有告者一切勿治法吏務崇寬恕慎獄恤民
違者罰無貸庚寅薛祿率師巡邊辛卯叅將安平伯
李安同陳智掌交趾軍務戊戌將還都南京詔北京

諸司悉稱行在復設行部及行後軍都督府改南京
兵部尚書張本工部尚書李友直爲行部尚書罷繕
工官是月賑薊任樂亭泰安平度蓬萊諸州縣饑夏
四月壬寅山東及淮安徐饑免今年稅糧之半罷一
切采辦設北京行都察院壬子皇太子居守南京戊
午謁長陵乙未至自長陵乙丑改張本爲行在兵部
尚書是月賑大名及鄭許杞邾諸州縣饑五月辛未
命吏部慎選御史且訪可任都御史者己卯改侍讀
李時勉侍講羅汝敬爲御史尋下之獄庚辰帝不豫
遣中官海壽馳召皇太子辛己崩于欽安殿年四十

有八宅月己巳上尊諡曰敬天體道純誠至德弘文
欽武章聖達孝昭皇帝廟號仁宗九月壬寅葬獻陵
論曰帝監國多年習於政事即周旋骨肉之際亦屢
經危險而後即安此非積誠所感而能如是乎況乎
改過不吝視民如傷詔諭拳拳具有肫懃惻怛之意
雖在位日淺而德澤下究固已淪洽於民心矣漢文
宋仁殆庶幾近之與

明史卷九

本紀九

宣宗

宣宗諱瞻基仁宗長子也建文元年二月生是夕成祖夢太祖授以大圭曰傳之子孫永世其昌彌月見之曰是兒英氣睟面符吾夢矣永樂五年出閣就學七年成祖幸北京從行過田家命觀農具作務本之訓賜馬八年成祖征沙漠留守北京九年十一月立爲皇太孫始冠自是巡幸征討皆從十一年五日幸東苑擊毬射柳帝連發皆中屬對應聲成祖喜賜名馬文綺語仁宗曰此太平天子也時漢趙二王謀奪

使者至乃知其誣然不治儼等罪故讒者無所忌成祖襲大統羣臣屢請建儲成祖意甚遲違永樂二年乃召帝于北京立爲皇太子成祖數巡幸命之監國裁決庶政高煦高燧與其黨日譖構殊未已或問帝亦知之乎曰不知也吾知盡吾子職而已然竟爲所中寔見疎十二年北征還以帝使迎駕緩且書奏失辭悉徵宮僚黃淮等下獄久之高煦罪狀大著成祖怒而徙之樂安始稍悟帝無他而高燧復與黃儼等譖帝擅赦罪人宮僚梁潛周冕等復坐死胡濙奉命察之密疏帝誠敬孝謹七事以聞成祖意乃釋後儼

僞撰遺詔謀立高燧事覺成祖震怒儼等皆誅死自是帝乃得安二十二年七月成祖崩于軍中八月甲辰帝遣太孫迎喪于開平丁未命中官王貴通守備南京釋夏原吉吳中黃淮楊溥等于獄丁巳即皇帝位大赦天下以明年爲洪熙元年罷西洋寶船逆西市馬及雲南交趾採取貨寶者戊午復戶部尚書夏原吉刑部尚書吳中官己未復置公孤官楊士奇爲禮部左侍郎兼華蓋殿大學士黃淮爲通政使兼武英殿大學士楊溥爲翰林學士直文淵閣庚申改工部尚書李慶于兵部禮部尚書金純于工部甲子汰

陶鎔發函閩驛糧貸饑民帝嘉之諭戶部勿責其專擅壬戌衛軍馮述上言設諸衛學校等事是之癸亥瓦剌部屬來歸丙寅禮部請於七月朔除服帝曰是雖遺詔朕心何能忍滿百日議之丁卯賜天壽山工役鈔布工部請更發江南北軍匠一十一萬八千人助工帝曰山陵事重朕不敢吝賞秋七月戊辰漢王高煦趙王高燧表賀賜倍常例己巳上大行皇帝尊謚乙亥尊母后張氏爲皇太后冊妃胡氏爲皇后戊寅諭吏部曰牧伯守令以承流宣化任用非人民受其害爾部宜旌別加之意己卯始朝除交趾儒學官

停烏程逋賦庚辰賜諸王黃白金文綺時高煦奏四
事帝喜顧侍臣曰皇祖嘗諭朕叔有異心宜備然如
今日言即舊心已革悉付所司行之辛巳賜京師官
吏軍民白金凡百萬壬午放河間編民殘疾孤獨者
還申軍民自宮之禁癸未犯事官王鳳等百餘人改
交趾丙戌賜山陵官軍工匠鈔己丑詔役山陵者復
其家辛卯命被災郡縣賦折鈔鎮遠侯顧興祖奏平
大藤峽蠻癸巳除丹徒決田賦勅戶部凡被災者悉
勘減免乙未諭法司慎刑獄閏七月己亥有軍士上
言事帝曰聖人不棄芻蕘命廷臣議可否庚子給邊

軍裘帽辛丑除濟南東昌牛租宥代王桂官屬罪壬寅命加禮先聖子孫宴勞賜予悉如一品例癸卯指揮李壁捕滅武緣賊乙巳勅修仁宗昭皇帝實錄戊申命安順伯薛貴等巡塞外癸丑交趾賊黎利圍茶籠命榮昌伯陳智援之庚申禁邊將進黃鼠壬戌勅鎮遠侯顧興祖討思恩覃公旺等賊乙丑諭吏部慎擇方面州縣官學士楊溥直內閣八月丁卯朔止賀瑞穀戊辰都指揮李英討安定曲先番寇大敗之安定王桑兒加失等詣關請罪己巳減寧夏等衛災賦庚午減蘇杭織造之半辛未免金壇災賦壬申命內

外羣臣各舉廉潔公正堪任牧民者所舉有犯連舉
主蔽賢者罪之乙亥工部請留建陵工匠帝曰詔書
豈可失信悉遣之丙子交趾賊阮可朗等伏誅勅蘇
州糧艘先後發運勿妨農丁丑免貴州食鹽鈔戊寅
禮部請易素服視朝不許己卯武進等富民分粟賑
饑帝曰富民尚恤貧况國家耶慎勿輕用厲民之政
癸未命大理卿胡榮叅政葉春巡撫直隸浙江丘福
以老疾還甲申鄭王瞻垓謁孝陵以恭慎諭之乙酉
命慎選經明行修者爲儒學官癸巳太白晝見甲午
命訪山林遺逸乙未交趾寇路文律等服罪丙申諭

武臣存恤軍士免思恩難民賦九月壬寅葬仁宗皇帝於獻陵丙午免萊陽災賦戊申免蘇松諸府及介休諸縣災賦己酉除長蘆被水鹽課癸丑審決盜帝曰盜固應死然聞煬帝同時殺二千人真犯數人耳臣下阿旨不復奏爾法司慎之乙卯免大學士楊榮戶徭役冬十月己巳勅兵部尚書李慶留南京陝西進獲安定番童還之丁丑復衛軍減支糧戊寅南京地震丁亥都御史劉觀等舉才能士十餘人納之戊子勅公侯伯府部大學士給事中審覆重囚著爲令賑貴州長官司饑己丑禁武官私役軍士十一月辛

丑停博野諸縣逋賦壬子詔諸服御器用從儉素甲寅鎮遠侯顧興祖討思恩賊覃公旺殲之己未詔撫罕東衛屬逃番辛酉黎利攻茶籠知府琴彭死之勅陳智等討賊壬戌免南昌建昌災賦甲子命都督蕭授討蠻寇苗銀總南京地震十二月丙寅朔南京地震戊辰命銅仁修儒學己巳南京地震辛未諭尚書張本辨明軍政癸酉南京地震甲戌賜獻陵工役官軍鈔幣免新昌諸縣田租乙亥賑邵陽饑辛巳南京地震甲申鎮遠侯顧興祖討宜山賊平之乙酉進嘉禾丙戌免完災賦丁亥免海寧租賦戊子免尤溪銀

場開辦增額庚寅帝謂蹇義等曰光武不以吏事煩功臣雖保全之意而人才則何可廢如伊尹閑散參陵平勃之舊皆有公輔器以爲功臣置弗用亦過矣我朝擇將臣宿望者掌五軍彼得以効用而大權悉出於上斯兼盡之道也辛卯免宣府諸衛災賦壬辰詔曰京師庶政所出羣臣朝夕趨事寧無過舉茲歲序更始宜與滄滌諸所記過犯悉蠲除之俾得自新是年朝鮮琉球占城爪哇蘇祿淳泥烏思藏哈密等番國來貢

宣德元年春正月戊戌敕諭羣臣務忠厚戒刻薄務

正直戒邪枉毋作聰明亂舊章毋黷貨利壞名節各
貞乃心用光汝績己亥選教官有學行者訓孔顏孟
三氏子孫辛丑敕顧興祖撫宜山餘寇甲辰南京地
震丙午命瓦剌賢義王子捏烈忽嗣爲王丁未祀於
南郊庚戌命岑密故忠義王兄子卜答失里嗣忠順
王漢王高煦獻燈偵覲朝事帝曰吾惟推誠以待之
廣西僮首韋敬曉等歸附壬子命劉觀察審土豪猾
胥虐民者癸丑宥雜犯死罪以下運糧宣府己未遣
侍郎黃宗載等十五人清軍伍安民壬戌貴州刺惹
洞服罪命罷師二月庚午免黃巖災賦辛未除山西

逋賦甲戌罷邊軍採辦薪炭丁丑耕籍田戊寅造軍
器免江南諸處運鐵南京地震庚辰減司苑局蔬菜
及葦蒲等物曰大禹惡衣菲食朕安可以園蔬累民
辛巳停江西官田重租丙戌謁長陵獻陵丁亥至自
天壽山三月乙未朔諭耆民孝親務本丙申罷陝西
採辦己亥陳智等討黎利敗績詔責之駙馬宋瑛請
白河地牧馬帝曰人與馬孰重命察給之民田勿與
癸卯除靜海獻逋賦甲辰命撫貴州蠻寇宋志道獲
之丁未諭戶部申飭有司省徵斂課農桑貧不自給
者賑之癸丑侍郎張瑛兼大學士直文淵閣丙辰罷

採膽繫夏四月乙丑命成山侯王通都督馬瑛討黎
利癸酉諭吏部曰銓衡以進賢退不肖爲職非至公
不能祛私非至明不能剔弊其務嚴選舉遏冗濫精
考核防詐僞毋俾小人進用貽患於生民丙子免黃
巖災賦戊寅御製外戚事鑒歷代臣鑒分賜之免濟
南兗州災賦辛巳罷山東顏料甲申除通海門決田
賦丙戌賑清平饑壬辰賑青州饑五月甲午朔諭法
司清理刑獄丙申詔許黎利等自新壬寅賜貴妃孫
氏冊寶丙午瘞遺骸戊申帝顧侍臣誦鋤禾日當午
詩曰朕每誦此未嘗不念農夫記八九歲時皇考書

是詩命解朕對曰稼穡艱難之義也皇考喜自是常
教以農事今宮車不復還矣言已泣下庚戌命右都
御史王彰自良鄉至南京巡撫軍民庚申賑真定大
名河間饑六月癸亥朔賜琉球國王冠服甲子賑寧
裕南豐蓬溪即墨英山諸縣饑乙丑賑涑水新河興
濟諸縣饑丁卯命顧興祖勦南平叛寇甲戌帝謂儒
臣曰易泰否二卦在進退君子小人朕用舍有不當
者卿等直言無隱壬午諭法司敬慎刑獄秋七月癸
巳京師地震甲午貸祁門巢饑京師地生毛乙未以
旱免山東賦丙申蕭授破輿洞巢賊己亥諭六科中

官傳旨必覆奏始行辛丑罷選民幼丁習技藝癸卯
南京地震乙巳再震丙午南京地震丁未諭兵部整
飭軍政辛亥捕安肅諸縣蝗壬子罷採湖廣大木癸
丑天鳴乙卯罷西寧操練餘丁歸農賑海寧諸衛軍
天鳴丙辰免長沙災賦八月壬戌朔漢王高煦反帝
決策親征命英國公張輔從癸亥召武安侯鄭亨還
天鳴甲子天鳴乙丑遣指揮黃讓等同平江伯陳瑄
鎮淮安召遂安伯陳英赴北京減行殿工役天鳴丙
寅南京地震丁卯封左都督費瓛爲崇信伯樂安故
御史李潘爲左僉都御史天鳴南京地震戊辰天鳴

南京地震己巳命鄭王瞻埈襄王瞻塏居守誓師大
賚將士命少師蹇義少傅楊士奇少保夏原吉太子
少保楊榮太常卿楊溥叅機務賜鎧馬弓劍辛未發
京師天鳴癸酉帝馬上謂侍臣曰卿等度高煦計安
出或言必取濟南武趨南京帝曰不然濟南猝未易
攻彼新軍皆家樂安孰肯棄之南下且高煦性狐疑
外爲夸詐中情怯耳以朕年少新立必不能親討一
遣將彼得以利害誘之今聞朕至膽已落况干天地
祖宗之怒至則禽矣天鳴乙亥諭諸將恤士卒給馬
馱醫藥丙子詔所過勿除道是日顧興祖討崇善賊

趙暹等平之戊寅自樂安來歸者言高煦狀悉如帝料衆叩服帝曰困獸猶鬪勿忽遣書諭高煦己卯天鳴庚辰帝令大軍兼行辛己昧爽至樂安諸將請一鼓拔其城帝不忍遣敕再諭之又敕諭逆黨賊衆潰亂壬午高煦就禽群臣請誅不許下逆黨王斌等獄宥脅從者癸未撫軍民改樂安爲武定甲申察軍過踐傷田乙酉班師丁亥南京地震庚寅陳山請移師襲趙王不許九月丙申至自樂安法司奏誅高煦不許丁酉群臣請表賀帝曰此國家不幸何賀爲天鳴戊戌法司言叛逆連晉王濟熿趙王高燧宜併治不

許己亥逆黨王斌等六十餘人伏誅辛丑賞從征將
士癸卯封乳母李氏爲奉聖夫人保母張氏佑聖夫
人丁未日上五色雲見己酉貸桐城遂安瑞安江山
諸縣饑壬子御製東征記示群臣冬十月辛酉朔追
封死節高盤女爲唐王妃丙寅進瑞麥己巳命廷臣
會錄重囚辛未賜朝鮮性理通鑑諸書癸酉袁亮征黎
善被執敕王通討賊丁丑除仁和海寧潮衝田賦戊
寅釋李時勉於獄復其官十一月乙未王通會兵討
黎善敗績尚書陳洽死之丁酉南京地震戊戌勅府
尹收殘疾饑寒民入養濟院辛丑賑湖廣饑丁未諭

法司免治高煦餘黨丙辰命捕西寧番賊十二月辛酉免東征踐傷田賦召尚書黃福於南京甲子黎利寇清化知州羅通擊却之丁卯宥高煦詞連逮繫者庚午李儀奏削趙王護衛不許辛未慮囚丁丑交趾賊寇隘留閔百戶萬琮擊却之乙酉命黔國公沐晟爲征南將軍興安伯徐亨新寧伯譚忠副之會安遠侯柳升等分道討黎利敕南京兵部尚書李慶叅贊軍務工部尚書黃福仍掌交趾布按司事丙戌貸四川饑是年朝鮮琉球暹羅爪哇烏思藏蘇門答刺滿刺加白葛達等番國來貢

二年春正月辛卯諭羣臣執德以廉治人以仁奉國以忠勤事以敬不恭命者有罰乙未賜征南官軍鈔丙申掌吏部事戶部尚書師達卒庚子祀於南郊癸卯貸永川饑乙巳貸射洪餘杭南豐諸縣饑丙午貽趙王書庚戌諭蹇義等曰薦舉人才悉召至試之賢不肖各以類進卿等宜詳慎勿濫辛亥指揮王瑀捕黎賊敗之癸丑設西寧學校免烏程諸縣災賦南京地震甲寅除膠逋賦戊午南京地震二月己未朔南京地震癸亥戶部侍郎陳山禮部侍郎張瑛俱爲尚書兼大學士乙丑大敗交趾賊黎利獲其僞司徒太

尉等官甲戌遣官祭宋丞相文天祥南京地震乙亥
賑沙州衛饑戊寅南京地震己卯再震辛巳除湘陰
牛租癸未南京地震乙酉南京地震丙戌命錦衣衛
分捕緣江賊禁役漕船軍士戊子南京地震三月己
丑朔策試天下貢士賜馬愉等一百人進士及第出
身有差諭儒臣曰文體士習視乎朝廷尚典實則日
趨厚尚浮華則日趨薄在激揚之有道也庚寅尚書
吳中爲少保調南京留守及各衛軍征交趾辛卯南
京地震丁酉罷湖廣竹木庚子都督蕭授討苗寇卓
把同等平之辛丑免湖廣運征南餉諭尚書蹇義曰

朕讀循吏傳有感於心乃序論之以示天下安得皆如六人者布滿郡邑哉乙巳有進曲風圖者帝曰周家王業之本教耕桑豫計饑寒君民親若父子所以傳世久遠也南京地震丁未免豐沛災賦乙卯貸彭澤隴西襄陽諸縣饑丙辰罷湖廣採辦四月己未朔王彰卒庚申增蘇松杭常嘉湖課農官黎利陷昌江都指揮李任指揮顧福劉順知府劉子輔中官馮智等死之甲子晉王濟熿有罪廢遷鳳陽武進伯朱冕尚書張本撫安山西軍民己巳王通私許黎利和介其使入請甲戌廣東瓊山黎賊餘黨平丁丑罷陝西

採辦五月壬辰賜羣臣扇癸巳命薛祿等護糧餉赴
開平乙未除廣平逋賦甲辰貸吳橋魏饑丙午慮囚
丁巳貸巴饑六月壬戌罷雲南銀場礦夫癸亥勅沐
晟等援昌江丁卯移開平衛於獨石己巳命顧興祖
勦欽州賊乙亥定中鹽例丙子諭直登聞鼓給事幽
隱畢開無阿比戊寅慮囚辛巳免老弱工匠秋七月
乙未勅顧興祖勦廣西諸山賊戊戌詔陝西雜犯輸
米岷州諸衛贖罪己亥賊陷隘留等関逮顧興祖治
之庚子慮囚辛丑命都督同知陳懷等討松潘叛蠻
壬寅諭蹇義曰用人當以德行學識爲本高位未稱

者改用之下位優長者進之宜加詳察俾協至公癸卯諭蕭授撫水西蠻寇甲辰貸合肥西河饑丁未陽武侯薛祿等襲寇於朵兒班你兒兀斬獲以還己酉命山雲爲征蠻將軍討賊壬子免崑山金壇諸縣災賦乙卯申嚴自宮之禁八月庚申放密雲夫役甲子少保黃淮致仕免徐保定河間及山西河南災賦戊辰以水旱諭蹇義夏原吉等共思弭災之道以回天心乙亥侍郎郭敦爲戶部尚書丁丑命隆平侯張信尚書郭敦整飭陝西九月丁亥賑無爲霍丘英山穀城諸州縣饑壬辰慮囚癸巳進嘉禾乙未柳升討黎

利於鎮爨閔敗績死之庚子勅勘山西災甲辰勘鳳
翔西安災壬子勘開邠徐宿高陵扶風長垣諸州縣
災蠲其賦冬十月丙辰諭蹇義等曰朕下詔求賢意
良切天下之大豈無伊傅諸葛其人比所舉庸鄙曠
位甚或以賄聞朕何賴焉卿一二人臣職惟進賢退
不肖舉能其官惟爾之功尚勉副朕命戊午免蕪湖
災賦甲子免陝西災賦乙丑免磁通賦丙寅閏唐元
宗所書孝經謂侍臣曰堯親九族舜克諧以孝帝王
之治皆自親親始靡不有初鮮克有終元宗之謂也
是日釋繫囚輸作丙子蠻寇燬綿竹鎮撫侯璉等戰

死之戊寅王通私與黎利盟約退師己卯貸松滋新城壽昌饑謂夏原吉等曰讒慝小人能誣正爲邪聽其言若忠其心則險聖讒遠佞朕於此切閑之卿等亦宜表正使奸邪寢謀庚辰沐晟師至交趾癸未王通以黎利表貢請立陳氏後許之十一月乙酉朔命侍郎李琦羅汝敬等詔赦安南罪冊封陳曷爲國王召文武官吏班師還京乙未皇長子生日下五色雲見己亥大赦天下免明年租賦十之三甲辰蕭授奏討阿骨等蠻命撫諭之賑衡陽衡山饑十二月乙卯侍臣講貞觀政要帝曰唐太宗致治之美實本於此

謂安天下必先正其身君道清靜則百姓安樂皆要
語也已未詔河南山西罪囚輸米寧夏贖罪庚午王
通棄交趾還廣西甲戌慮囚丁丑賑陝西饑運南京
絹布十五萬疋給之己卯罷陝西科徵役壬午以閔
中饑作書愧詩示夏原吉是年朝鮮琉球暹羅占城
爪哇烏思藏瓦剌回回火者乞等番國來貢
三年春正月庚寅命哈密故忠義王子脫歡帖木兒
嗣爲王壬辰除羣臣過甲午祀於南郊丙申松潘蠻
就撫己亥都督蕭授獲叛蠻紀那等死於獄庚子勅
撫愴哈剌癸卯貸黔饑辛亥召用范仲淹十二世孫

希正二月甲寅分遣給事中御史清理天下軍伍戊
午立皇長子祁鎮爲皇太子丙寅勅山雲審處交趾
善後事宜丁卯奉皇太后遊西苑帝親掖輿登萬歲
山奉觴上壽並獻詩戊辰勅法司曰比聞刑罰失當
朕心惻然咨爾法司險邪者利口柔良者寡訥惟言
是稽情僞何辨玩愒歲月繫囚瘦死移情就獄畏勢
徇託報復恩怨甚且鬻獄取賄不復畏恥尚其警省
前愆克恭朕命爾亦貽福子孫如或不恭國有明憲
庚午罷陝西役辛未除河逋賦癸酉儒臣講舜典帝
曰是蓋天生聖人爲後世法孔子刪書斷自唐虞誠

萬世帝者師也已卯命吏部召薦舉士於內廷試之
壬午詔興水利御製帝訓成三月癸未朔皇后胡氏
以疾遜位立貴妃孫氏爲皇后戊戌免瀘戶絕田賦
癸卯頒選武臣條式免山西役丁未釋老幼殘疾工
作夏四月甲寅諭國子監祭酒等官崇教化以端士
習罷南京諸工作丙辰汰冗員辛酉減內府採辦供
用物癸亥詔官民上言民瘼罷四川運餉甲子除保
定河間逋賦丙寅賑山西饑禱雨示楊士奇等御製
曹參論甲戌諭思任發還所侵南甸地辛巳貸邢臺
饑閭四月庚子禱雨除館陶逋賦罷番禺銀冶辛丑

罷採買香藥壬寅慮囚賑平陽饑免其賦甲辰遣官
撫流亡庚戌論王通等棄交趾罪坐死籍其家顧興
祖并下獄五月壬子朔李琦等還黎利奏稱陳曷卒
辛酉慮囚乙丑蠲安逋賦戊辰諭有司存恤流民己
巳命羅汝敬等使交趾訪陳氏後貸成安滑吳橋諸
縣饑辛未卹交趾死事諸臣貸高郵瑞昌諸州縣饑
壬申免真定順德廣平災賦甲戌汝南王有勲新安
王有燾以罪廢免保定霸逋賦庚辰御製酒諭示羣
臣辛巳叛臣蔡福等伏誅六月丙戌免西安延安鞏
昌災賦甲午遣官賑山西饑壬寅免河南浙江桑穰

癸卯免高密逋賦乙巳指揮傅廣自宮罪之丁未劉
觀巡視河道戊申帝閱祖訓終卷謂侍臣曰朕有言
行悖于成憲卿等直言之其永無愆己酉罷製新鈔
秋七月辛亥朔勅捕建陽等賊甲寅疏決繫囚丙辰
通政使顧佐爲右都御史順天河間保定水命戶部
恤之己未進瑞麥庚申諭吏兵二部中官傳旨授官
必行覆奏辛未停開平運糧甲戌免大興逋賦八月
癸未右都御史致仕向寶卒辛卯革行後軍都督府
行部乙未帝將巡邊命張輔等簡閱京衛軍士丁酉
加給士卒衣糧免香河諸縣災賦壬寅詔所過勿進

獻不治道免吳江常熟華亭災賦甲辰諭扈從諸將
定留守事宜丙子申戒將士釋邊衛指揮千戶等罪
丁未發京師召諸將諭曰朕深居九重詎不自樂此
行爲保民也爾將士敢有秋毫犯者殺無赦九月庚
戌朔次薊辛亥次石門兀良哈萬衆寇邊帝曰此須
禽之不可縱也前路險僅容單騎若俟諸將並進將
後事機朕先率鐵騎三千破之衆請益兵帝曰兵在
精與和三千騎足辦賊矣壬子簡騎士三千人人二
騎羸十日糧癸丑命宋瑛等帥師駐遵化楊榮扈從
甲寅前哨副千戶潘雄遇寇于鹽帽山力戰死之乙

卯帝出喜峰口夜馳四十里昧爽至寬河與寇遇分
鐵騎爲兩翼夾擊自射其前鋒殪三人礮發寇死者
半餘潰走帝率數百騎追之寇下馬羅拜請降皆生
縛獲駝馬輜重以還丙辰斬其渠搜山谷巢穴忠勇
王金忠及其甥請自効并遣往戊午饗將士于會州
製詩歌勞之甲子詔班師丁卯諭諸將約束軍士癸
酉帝至京師告廟朝皇太后置酒上壽乙亥貸於潛
彭澤邵陽饑免金壇當塗災賦丙子免開封及沔陽
監利災賦冬十月乙酉諭廷臣曰古者師保之職論
道經邦不煩以事少師義少傅士奇少保原吉太子

少傅榮皆先帝簡畀遺朕春秋高尚領庶政非所以
優之也賜敕輟所務居朕左右討論至道勲階爵祿
并如故乙未罷蘇松浙江採辦戊戌雪帝賦詩示羣
臣己亥劉觀有罪下獄乙己賑澤蒲沁水靈石饑十
一月辛亥浚蘇七浦塘賑武岡星子饑庚申都督蕭
授奏撫叛蠻械賊首羅文蕩于京師辛酉賑臨安新
城饑癸酉指揮鍾法保請採東莞珠帝曰是欲擾民
以漁利也繫之獄十二月甲申賑平陽饑癸己召薛
祿等還乙未審覆重囚丙申巡撫胡聚械平康賊黨
至京戊戌除定興戶絕賦釋老疾工匠庚子總兵官

山雲奏禽賊首譚團等及斬獲數乙巳除羣臣過是
年朝鮮琉球暹羅爪哇占城烏思藏喀密等番國來
貢

四年春正月庚戌南京地震甲寅再震丁巳北京地
震己未祀于南郊癸亥增獨石等戍丁卯賚從征將
士己巳免宣府各衛歲辦薪炭召學士楊溥諭曰今
天下初安朕恒自喜然禍亂生于不虞古君臣更相
儆戒卿宜勉輔朕于善有過其直言無隱辛未南京
地震二月丁丑朔賑高邑饑癸未敕英國公輔輟府
務居左右匡弼勲階爵祿如故乙酉南京地震丁亥

羅汝敬等還黎利奏稱陳氏無存者遣御史清理陝西軍伍己丑襄城伯李隆獻驕虞二胡濛請賀不許庚寅免天下逋賦丁酉詔曰致治人倫爲先五刑三千不孝莫大諸敗倫傷化者有司毋擅決悉送京師鞠治著爲令論夢卜求賢數曰高宗恭默思道蓋有得於天矣然有高宗之心斯得傳說之相若漢文以夢得鄧通光武以識用王梁豈不誤哉戊戌北京地震壬寅除即墨逋賦三月戊申朶顏諸衛入貢詔以所俘還之倭寇鎮海壬子聽選官歐陽齊請開永康銅礦斥之丁卯以兀良哈朝貢數隨征軍士還衛甲

戊復遣李琦等諭黎利訪陳氏後夏四月戊寅賑延
安饑庚辰停陝西運茶辛巳都督山雲討柳澤叛蠻
平之丁亥吏部侍郎郭璉爲尚書戊子命工部尚書
黃福經理漕運辛卯禱雨丁酉召大學士楊士奇楊
榮金幼孜嘗鰥賜御製詩庚子南京地震曉再震五
月己酉捕永清蝗壬子慮囚丙辰遣官經理邊軍屯
田乙丑詔修陂池隄堰癸酉作典謨詩示羣臣六月
戊寅增雲南科舉額壬辰召致仕太子太師郭資至
仍掌戶部事甲午罷文職贖罪犯賊科斷如律己亥
寇掠獨石鎮撫張信等戰死癸卯遣御史捕近畿蝗

秋七月壬子上戶口數帝曰人主恭儉則國家無事
生齒日繁財賦自充隋煬不縱其奢欲文帝富庶之
業豈得遽至敗亡哉丙辰廣東進白鳥二胡濙請賀
不許己未帝御文淵閣論經史政務賜楊士奇楊榮
及翰林官鈔庚午宥劉觀死居之遼東辛未加賜五
王祿米至萬石八月丙子命侍郎羅汝敬等分督蘇
松浙江江西運糧丁亥諭六科曰給事職司封駁凡
朝政得失庶官賢否民情休戚皆得入告朕嗣大統
期於庶政修和爾等授官有年尚思委畀之重其懋
勉之辛卯有獻兵書者帝曰方略存乎人世稱孫武

止於彊霸曹操得其術終亦不能取吳蜀所謂桓文之節制不能敵湯武之仁義也丙申禁文武官挾妓九月壬子重陽賜羣臣宴御製詩示文武大臣癸丑給土官田乙卯命生員兼習書算免濟南東昌災賦壬戌申種桑棗之令癸亥宥顧興祖罪丁卯敕朝鮮勿獻珍禽奇獸戊辰命修范仲淹陸贄祠胡瑗魏了翁書院冬十月丙子賞捕倭將士丁丑敕諸司公事不得遣在外正官庚辰帝御文淵閣謂楊士奇等曰朕聞願治之主崇儒碩求治道卿等爲朕保傅諸儒臣並處秘閣朕時至訪問冀有所聞出尚膳酒饌并

作詩賜之乙酉貸建德饑丙戌作猗蘭操賜諸大臣
曰孔子自傷不遇託爲此操朕慮賢人在野擬作其
詞卿等其敷求遺逸以副朕懷戊子賜儒臣內帑鈔
親書御製詩賜之庚寅改張瑛爲南京禮部辛卯敕
朝鮮貢土物勿用黃白金甲午閱武於近郊乙未獵
峪口戊戌至自峪口十一月癸卯朔命薛祿等帥師
巡邊庚戌南京地震壬子免成安災賦以皇太子生
日寬減繫囚己巳賑黥饑庚午賑臨安於潛饑免內
黃災賦十二月甲戌泰安奏中官採天麻擾民帝曰
朕豈以口腹累天下召還治之庚辰南京地震癸未

有建言改法制者斥之甲申宥平浪賊黨罪己丑免
鳳陽順天災賦壬辰罷松花江造船乙未敕修歷代
帝王忠臣廟是年朝鮮琉球占城爪哇烏思藏哈密
等番國來貢

五年春正月己酉雪帝作喜雪歌示羣臣壬子南京
地震癸丑祀于南郊戊午諭朝覲官盡職業辛酉南
京地震壬戌進兩朝寶錄乙丑諭省官安民之道帝
曰事省則官可省清心又省事之本也丙寅刁不浪
班等順服戊辰少保夏原吉卒庚午置遼東寧遠衛
于湯池二月壬申朔敕免夏原吉子孫徭役癸酉免

房山諸縣災賦丁丑勅御史等官廉察兵政戊寅賜
衍聖公第丙戌賜迤北和寧王藥物丁亥罷江西採
石中官庚寅工部尚書吳中兼吏部事壬辰罷採木
癸巳下寬恤之令乙未奉皇太后率皇后詣天壽山
帝橐鞬騎導躬扶太后輦渡清河橋次沙河謂蹇義
等曰昔朕侍皇祖過農家訓言未敢有忘今望村居
田作追維往事悽愴不能自抑矣丙申謁陵戊戌戒
諭外戚三月辛丑朔作皇陵春雨詩示從官丙午賜
從官豆粥丁未進皇太后大德頌戊申道見耕者取
耒三推顧侍臣曰朕三舉耒己不勝勞况農民終歲

勤動乎賜之鈔自是所過悉賜如之作賞春賦己酉
至自天壽山庚戌製昌平召問農夫文辛亥李琦等
使還黎利貢方物乞封乙卯策試天下貢士賜林震
等一百人進士及第出身有差賦策士歌示執事官
丙辰免平陽災賦陽武侯薛祿遇寇於鳳凰嶺斬獲
以還陳瑄奏備楚藩斥之丙寅總兵官山雲奏斬柳
州蠻寇太白晝見夏四月壬申罷運甑石役甲戌免
萬逋賦戊寅命薛祿等築赤城諸堡賜之詩侍郎成
均專理蘇松諸府農務勅勦梅花洞賊庚辰賑高唐
諸州縣饑癸未重修玉牒成甲申大學士楊榮爲少

傅乙酉諭黎利訪陳氏後己亥捕近畿蝗五月丙辰
修天下預備倉癸亥擢郎中况鍾等九人爲知府賜
之勅六月庚午朔免河南逋賦乙亥兵部尚書張本
兼戶部事免易涑水租賦戊寅遣太監鄭和等詔諭
諸番國己卯遣官捕蝗帝曰徃聞督捕官害民不減
于蝗宜嚴飭戒作捕蝗詩示之丁酉勅沐晟諭木邦
還緬甸等侵地秋七月癸卯免河南租賦二年乙巳
太白晝見戊申進瑞麥太廟產嘉禾請賀不許己酉
論商周得天下之道帝曰契稷敷教明農功德在人
用集大命於其子孫是以篤生聖哲享國長久積厚

流光蓋非偶然也癸丑賑景饑甲寅貸無爲饑辛酉
陽武侯薛祿卒癸亥詔吏部甄別守令八月己巳朔
日當食陰雨不見請賀不許己卯改黃福于戶部同
郭資張本規畫屯田甲申詔舉廉吏九月己亥朔免
永平河間廣平開封逋賦壬寅捕濬蝗免絳稷山災
賦乙巳貸瑞昌饑丙午擢趙新于謙等爲侍郎分督
南北直及浙江江西諸省糧餉丁未宴羣臣賜詩命
和庚戌免汾陽逋賦壬子免濰租賦乙卯巡近郊己
未還癸亥免新河諸縣災賦丁卯罷饒州造磁器冬
十月己巳免金壇逋賦庚午免河南役辛未除丹徒

江沒田額乙亥寇犯遼東指揮皇甫斌戰死丙子帝
巡邊發京師丁丑次龍虎臺召張輔蹇義楊士奇等
于幄親酌酒飲之己卯獵于岔道進皇太后獲禽勅
燒荒丙戌至洗馬林閱城堡士馬丁亥獵己丑命都
督郭義等留宣府備寇壬辰帝至京師甲午賑彭澤
饑乙未賑於潛免成安內黃災賦十一月己亥總兵
官山雲奏斬潯州等蠻寇辛丑罷運木乙己南京地
震丙辰貸賑饑庚申捕金華寇賑會稽餘姚饑癸亥
減麗水諸銀冶課額十二月乙亥南京地震庚辰雪
宴羣臣製喜雪詩賜之命和壬午寇犯開原戰死者

恤其家乙酉免定興租賦丁亥舍警星見彗見戊子
北京地震癸巳都督史昭奏平曲先叛番閏十二月
戊戌羣臣表賀舍警帝諭以儆戒無虞之意己亥免
開租賦壬寅免魏逋賦丁未諭戶部曰比者郡縣水
旱民賦不登有司催徵苛急逃亡日甚朕甚憫之其
令宣德三年以前逋賦折輸布絹及鈔己未詔諸司
淹繫囚者罪之是年朝鮮琉球占城爪哇靈藏烏思
藏瓦剌坤城哈密諸番國來貢

六年春正月丁卯罷湖廣採木癸酉尚書張本卒丁
丑祀于南郊己卯胡濙兼戶部事庚辰除丹徒瀕江

田賦勅捕麗江等賊壬午侍郎許廓爲兵部尚書乙酉賑萬饑庚寅免安邑逋賦勅撫阿端諸衛二月丙申朔作招隱詩示廷臣丁酉侍郎羅汝敬經理陝西屯務己亥濬金龍口引河通漕壬寅滿剌加國告暹羅侵害賜勅諭之乙巳以萬壽節侍皇太后詩賜蹇義楊士奇等庚戌貸魯山嵩林諸縣饑己未免永寧諸縣逋賦三月丙寅除南鄭金戶絕賦儒臣進講大學平天下章帝曰治天下不可無財用如生之者衆四言之有餘矣又曰秦誓曲盡君子小人情狀人君審此豈非萬世龜鑑耶辛未貸廣平諸縣饑壬申

作喜雨詩示大臣甲戌免滿城租賦乙亥命考察外
官自布政按察司始己丑勅陳懷招諭略匠等寨夏
四月乙未朔免益都逋賦戊戌彗星見甲辰賑五臺
饑乙己尚書郭敦卒己酉侍郎柴車理山西屯務免
安丘逋賦辛亥除合江荒田賦壬子賑葉饑丙辰漂
陽妖人錢成等謀逆伏誅壬戌免霑化諸縣逋賦五
月乙丑賑富順饑丙寅免封丘逋賦黎利奉表謝罪
乞封甲戌召捕梅花洞官軍還戊寅免西鄉金逋賦
壬午免成安永年魏逋賦丁亥免高苑博興逋賦六
月己亥遣侍郎章敬等勅諭黎利權安南國事甲辰

捕濟寧滋陽蝗乙巳賑豐饑丁未作憫農詩示郭璉
俾釋賢守令辛酉免開逋賦壬戌示蹇義等招隱歌
曰往朕作詩求賢恐巖穴之下猶未悉朕意茲復作
歌且序之庶幾幽遠之士有幡然而起者秋七月丁
卯囚反獄帝曰繫囚有輕重強盜若姑息之是虎逸
于柙人復害矣己巳慮囚庚午詔四川雜犯軍民輸
粟贖罪捕魚臺蝗丁亥勅譚廣築龍門諸城堡戊子
免雞澤逋賦己丑賑興化犍爲諸縣饑八月乙未阿
魯台爲瓦剌迫逐遣勅諭安之己亥禁公差官凌轢
有司壬寅疏濬沱舊河癸卯免肥鄉逋賦丙午勅陳

懷諭曩甲還魯思麻土地蕭授撫諸苗丙辰勅諭諸
土官歸互侵土地庚申命李賢等帥師運糧獨石諸
處九月癸亥熒惑犯南斗己巳帝諭郭璉曰朕意地
方保官皆直道今劉迪以羊酒邀諸老人人言顧可
信耶然賢否固自不同亦不可以此盡疑之丁丑賑
肥鄉新河饑戊寅貸孝感饑丙戌罷白泥溝銀冶冬
十月乙未貸桐城饑己亥諭郭璉等曰御史託之耳
目凡政務得失皆資奏舉邇乃朋比合污作威附勢
自今必擇老成謹厚明達治體者按察司掌一道風
紀亦宜慎選毋任非才貸瑞昌饑甲辰都督陳懷討

松潘番寇平之丙午巡近郊庚戌還宮丁巳命恤運糧軍民免固安災賦十一月癸亥帝製祖德詩九章刻之石以摹本賜楊士奇等曰祖宗盛美豈可知而不傳朕用朝夕觀覽勉圖繼述庶幾永保天命也丙子賑於潛饑乙酉以中官在外貪虐遣御史往械之己丑勅法司疏決繫囚辛卯免夏津逋賦十二月乙未中官袁琦等伏誅丁未大學士金幼孜卒戊申免大名廣平真定河間及徐逋賦庚申賑平遙饑免長沙租賦是年朝鮮琉球占城蘇門答刺烏思藏哈密等番國來貢

七年春正月辛酉朔日有食之丁卯遣中官使西域
哈烈諸國癸酉祀于南郊乙亥寇入邊李謙擊走之
丙子雷壬午免徐溝逋賦癸未免水德蠻戶絕糧鈔
丙戌遣中官使琉球勅諭日本來朝戊子彗星見二
月壬辰免長子逋賦甲午慮囚乙未安隆土官孫岑
俊等順服帝曰蠻人寬以撫之得其安則已不足深
治也丙申章敞使還權署安南國黎利貢方物表謝
戊戌雨帝居齋殿賦承祭甘雨歌己亥增順天鄉試
額壬寅勅陳懷撫諭播州諸蠻癸丑命侍郎柴車侍
讀苗衷等清理軍職貼黃戊午賑太原平陽汾州饑

己未諭蕭授撫貴州湖廣生苗三月庚申朔頒寬恤
之令辛酉作減租詩示胡濙曰朕以官田賦重十減
其三聞戶部廢格詔令澤不下流茲作詩以述意卿
當體念勿忘壬申蕭授奏勦吳不爾等叛苗甲申禱
雨乙酉都督山雲奏斬蠻寇級數帝曰蠹賊固所當
去然殺之過多官軍亦豈無損天地好生朕意正欲
兩全之夏四月庚寅勅撫宜山等逃寇辛卯賑高陽
元氏諸縣饑壬辰免高平租賦辛丑以旱免山西通
賦勅捕汾代陽曲賊壬寅募商中鹽儲邊癸卯賑魯
山曲周諸縣饑辛亥屯留雹殺麥壬子賑安肅饑五

月甲戌山西進龍馬駒請賀不許丙戌成國公朱勇
奏遼東屯務從之六月己丑都督蕭授平辰州寇獻
其渠賑吳橋饑己亥尚書許廓卒癸卯慮囚乙巳詔
曰朕爲天下主惟欲生民咸復其業乃者招集流亡
來歸居無室廬耕無牛種有司略不加恤責以逋租
多方苛擾刑驅威迫荼毒弗勝其令巡按御史按察
使廉察罪之不舉者同罰戊申免寧遠逋賦癸丑罷
中官入番市馬乙卯免開封災賦製官箴三十五篇
示羣臣諭曰舜命九官十二牧皆有訓辭况朕涼德
敢不祇懼用取古人箴戒之義俾諸司庶幾有儆然

古君臣有交警之道百爾君子尚以嘉謨來告毋有
所隱秋七月己未詔官田悉準民科率蠲其逋庚辰
免泰逋賦賦曲風圖詩揭之便殿癸未登萬歲山周
覽京畿曰此元之故都也世祖信任儒術休養民力
以成帝業仁宗繼之使順帝能守祖宗法天下豈爲
我有紂之跡周之鑒也八月壬辰有妄男子訕誹於
西華門羣臣請下法司帝曰聖世有誹謗之木此何
足罪釋之乙未諭楊士奇楊榮曰往詔求賢作招隱
猗蘭詩示意惟卿二人舉黎恬等餘至今未有應者
豈果天下無遺賢與特以朕言爲虛文耳其令吏部

及諸臣推擇以聞仍同都察院黜方面有司之貪庸
不職者己亥改戶部尚書黃福於南京擢員外魏驥
爲少卿知州黎恬爲諭德教諭楊壽夫彭琉爲編修
周銓等爲叅政叅議副使等官以大臣舉薦也辛丑
獻嘉禾瑞瓜請賀不許戊申免直隸及徐災賦己酉
貸常州饑辛亥置蘇州濟農倉癸丑進嘉禾九月辛
酉免長洲諸縣災賦庚辰作織婦詞示廷臣冬十月
己丑釋罪囚運米實邊辛卯免濟南災賦丙申貸薊
豐潤遵化饑己酉賑遂平饑辛亥八百大甸入貢乞
師討波勒降勅諭之賑懷遠遂安饑十一月己未蠲

萬泉蕪田賦辛酉召陳瑄等還辛未朝鮮獻松菌及鷹諭止之甲申賑臨安瑞昌饑大霜霧木冰十二月庚子捕會昌賊壬寅諭烏蒙烏撒還互侵地勅勦南雄賊丁未雷雨霰是年朝鮮琉球占城哈烈哈密瓦剌烏思藏扯兒禪等番國來貢

八年春正月戊午雷電丁卯祀于南郊甲戌勅侍郎趙新等曰爾等巡撫郡縣務宣朕德意綏下民植善良諸稅賦悉從區畫俾人不勞困輸不後時諸有便民者悉以聞丁丑貸山東饑庚辰遣陳勉撫諭贛州盜二月庚寅貸順德大名衛輝兗州饑戊戌遣行人

諭烏撒烏蒙仍勅巡按御史往平之命山雲勦廣東
西賊庚子賑寶坻玉田饑壬寅賑東昌饑甲辰命沐
晟勦撫大營諸寨蠻乙巳賑盧龍雞澤饑庚戌免蒲
災賦辛亥遣官馳賑南陽饑壬子慮囚賑平陽饑三
月甲寅朔禱雨丙辰策試天下貢士賜曹鼎等九十
九人進士及第出身有差戊午設烏蒙軍民府儒學
賑原武西平磁魏諸州縣饑戊辰貸固安諸縣饑癸
酉遣使撫黑水番及阿容等簇賑通景邢臺元城永
年冀博野中年鈞濱諸州縣饑庚辰詔內外風憲官
糾察各衛武職之不恤軍士者壬午詔減軍衛餘丁

歸農夏四月葺廣寒清暑二殿分貯圖書壬辰賑汝
裕饑丙申賑南和河間諸州縣饑戊戌以兩畿河南
山東西旱詔免夏稅及逋賦罷採辦諸物仍賜復一
年雜犯死罪以下減等有司舉賢良方正各一人官
吏貪酷虐民者奏治之辛丑勅勦永康武義等賊壬
寅賑洵陽諸縣饑丙午命副都御史賈諒等勦郟彭
諸縣賊賑安雄東光尉氏饑五月甲寅日本入貢丁
巳總兵官蕭授奏平烏羅等苗辛酉賑全椒肥鄉吳
橋安邑饑乙丑賑順義清河宿徐沛確山饑丁卯總
兵官山雲奏平宜山寇己巳貸廣宗興濟青濬饑庚

午賑淮安鳳陽及徐饑壬申召陳懷還別勅叅將蔣
貴撫勦番蠻戊寅賑蒙城絳深澤樂亭諸州縣饑六
月甲申賑遵化玉田饑乙酉禱雨作憫旱詩示羣臣
甲午賑祁桐城定遠襄垣饑丙寅遣官察兩畿山東
西河南災蠲其租賦庚子副都御史陳勉奏撫贛州
盜辛丑詔天下疏決罪囚己酉寇犯開平秋七月壬
子朔捕宜陽永寧蝗己未安東諸屯衛旱除其租辛
未誠諭羣臣修職業壬申寇犯搗兒崖免江西災賦
癸酉免山東山西災賦丁丑賑光化沔陽諸州縣饑
戊寅賑巢如臯饑八月壬午勅撫摩沙勒寨蠻癸未

免隆慶宣府左衛屯糧之半甲申修吉安忠節祠祀
歐陽修周必大楊邦乂胡銓楊萬里文天祥辛卯捕
濟南兗州蝗壬辰陳懷有罪下獄癸巳汰行在部寺
冗官甲午賑湖廣饑戊戌賑瑞昌饑己亥進嘉禾庚
子賑桐廬饑丁未熒惑犯南斗閏八月辛亥朔蘇門
荅刺諸國貢麒麟胡濙請賀不許壬子彗星見戊午
吏部尚書郭璉兼都察院事景星見胡濙請賀帝曰
時和歲豐爲上瑞星文何救民饑而云瑞哉聖賢惟
德是敬不因祥而自矜其止之己未進嘉瓜瑞麥庚
午彗星見辛未古州賊渠伏誅戊寅賑霍丘諸縣饑

九月癸未貸抗嚴饑乙酉遣官審覆天下重囚戊戌
召南京右都御史熊檠至命視都察院事己亥寇犯
涼州總兵官劉廣追及斬獲以還冬十月丙辰少師
蹇義少傅楊士奇滿三考賜勅獎諭丙寅平江伯陳
瑄卒庚午貸崇安上杭饑戊寅命劉廣等討罕東番
寇十一月乙酉賜朝鮮五經四書大全諸書癸己長
河洞賊渠伏誅十二月壬子寇犯永昌指揮李榮等
追擊敗之甲寅郭資卒庚申樂州進野蠶繭乙亥除
京官過名戊寅賑碭山饑是年朝鮮琉球占城暹羅
及滿剌加咎密等番國來貢

九年春正月甲申雷雨辛卯祀于南郊丁未貸武平
饑二月庚戌移粟賑鳳陽淮揚徐饑罷一切科辦乙
卯申兩畿山東西河南恤災之令諸州縣衛倉糧悉
以賑仍發徐淮倉濟之戊午賑平涼饑庚申作思賢
詩示羣臣甲戌慮囚三月戊寅朔皇太子初受朝於
文華殿總兵官山雲奏平思恩叛蠻請討鬱林寇壬
午勅蕭授撫捕都勻衛等寨蠻癸巳帝與侍臣論兩
晉曰古先帝王崇尚禮教兩晉風俗淫僻士習浮薄
禮樂教化蕩然豈久安長治之道哉甲午山雲奏斬
柳尋及思恩餘寇乙未賑登州武進興化諸州縣饑

壬寅兵部右侍郎王驥爲尚書夏四月辛亥賑河間
松江汝寧襄陽饑癸丑發徐淮倉賑鳳陽饑丁巳罷
江西工部派徵己未李琦等使還黎利死子麟貢方
物庚申諭廷臣修職業乙丑滿剌加國王西里麻哈
刺者來朝戊辰慮囚壬申賑浙江饑五月丁丑朔捕
濟寧滋陽鄒祥符蝗壬午瘞暴骸癸未勅山雲捕鬱
林博白賊賑蘇州和吳橋安邑饑乙未貸滑饑丁酉
申侵牟軍士之禁戊午山雲爲都督同知庚申賞廣
西有功將士庚午免順天災賦辛未免應天青萊順
廣永平災賦乙亥貸福建及連城諸縣饑秋七月壬

午貸滁徐碭山饑甲申遣給事中御史督捕兩畿山
東西河南蝗乙酉免保定河間及鎮朔諸衛災賦辛
卯貸分水饑壬辰貸如皋饑庚子番寇劄兒加等貢
馬贖罪八月戊申勅蕭授撫勦刺惹洞蠻庚戌巡撫
湖廣侍郎吳政請留運糧四十四萬石備賑從之丁
巳太常寺卿楊溥爲禮部尚書仍兼學士壬戌蠲定
遼茂河涿鹿諸衛災賦甲子勅察各屬災傷蠲秋糧
十之四乙丑遣侍郎魏源撫永豐等亂民仍令都督
任禮率兵繼之罷兩畿湖廣河南江西採辦戊辰諭
撫阿魯台子及其部屬離散者己巳瓦剌入貢并請

獻故元玉璽癸酉召試翰林官馬愉等三十七人賜
賚有差九月乙亥朔賑碁江諸縣饑蠲江都德安災
賦丁丑勅蕭授撫勦十四坪草塘賊庚辰賜大學士
黃淮詩癸未帝巡邊發京師禁將士入民舍戊子召
少傅楊士奇清問軍民出馬上詩數章示之乙未阿
魯台子阿卜只俺請歸附命中官王貴等往納之丁
酉至洗馬林閱城堡己亥獵諸將請出寨掩擊帝曰
朕此來飭邊備非黷武也且嘗遣人撫之豈可失信
不許冬十月丙午帝還宮永豐賊渠夏九旭等就禽
丁未貸高郵通江都饑戊申貸六安英山銅陵諸州

縣饑己酉免廣洋諸衛災賦仍命賑之遣人撫湖廣
浙江災民庚戌命有司賑鳳陽濟南饑辛亥免豐城
清江諸縣及常德荊州諸衛災賦甲寅勅諭黎麟權
署安南國事乙卯總兵官劉廣獲寇完者帖木兒獻
之勅趙新勦撫奉新冠丙辰方政奏平松潘叛蠻命
爲都督同知甲子罷陝西市馬丁卯以兩畿浙江江
西湖廣河南災再下寬恤之令諸應運臨清南京倉
糧悉留備賑十一月甲戌朔慮囚已丑發衡州長沙
倉糧一百五十餘萬石賑湖廣饑庚寅免温州丁絕
魚課辛卯貸吉安饑乙未貸鎮江鳳陽饑庚子免四

川及鳳陽諸衛災賦十二月丙午勅瓦剌脫歡勿獻
玉璽有僧自陳請祝聖壽者帝斥之己酉減除竹山
佃田稅貸樂清遂安桐廬彭澤饑庚戌中官馮林有
罪伏誅庚申諭胡濙等曰茲上天降災水旱疾疫民
弗能堪朕深切憂懼卿等其勉圖匡濟有可以格天
心恤民命者悉以聞壬戌召楊士奇等出御書洪範
篇及御製序示之甲子帝不豫太白晝見是年朝鮮
琉球占城暹羅烏思藏喀密等番國來貢

十年春正月癸酉帝以疾不視朝命羣臣朝皇太子
於文華殿甲戌大漸召還內外採辦官罷營造諸役

乙亥帝崩於乾清宮年三十有八遺詔國家重務白
皇太后始行丁酉上尊諡曰憲天崇道英明神聖欽
文昭武寬仁純孝章皇帝廟號宣宗六月辛酉葬景
陵

論曰詩美周成不過曰紹庭訪落與彌性純嘏而已
帝仁孝性成而諭教亦蚤洎即位復圖任舊人共政
監于成憲以永無愆既歷一紀俗易風移四方綏靖
則其稱爲一代令主不亦宜乎且當時成祖以篤愛
文孫斥二王奪嫡之計而昭皇乃得安其位傳及於
帝果能繼序繩武不負烈祖佑啟之令謨然則大主

叶夢永世其昌殆自天命之夫豈人力也與哉